

79169(6)

MIRACLE

ARRIVÉ DANS

LA VILLE DE GENÈVE

EN CESTE ANNÉE

1609.

D'une femme qui a fait vn veau,
à cause du mespris de la puissance
de Dieu, & de Madame
saincte Marguerite.

*Les femmes souillées de sang enfanteront
des Monstres. Esdras, chap. 5.*



A PARIS,

Iouxte la copie imprimée à Tonon, prés
ladite ville de Genève.

1609.





MIRACLE D'VNE

*femme qui a fait vn veau dans la
ville de Genève, à cause du
mespris de Dieu, & de
sainte Marguerite.*

MON aage, Messieurs, qui pend
sur le déclin, m'ayant acquis
cette régale en l'hyuer de ma vie,
que ie puis dire franchement
(pour le salut de ma patrie) tout ce qu'une
barbe chenuë parmy les diuers essais des af-
faires de ce monde peut auoir appris, me
faict dire que nous sommes bien-heureux en
vn seul poinct, que l'ire de Dieu n'est point
tournée contre nous, qu'il nous vueille si
tost délaisser; ainsi nous aduertissans par si-
gnes prodigieux, & monstrueux, encor
nous donne le temps pour nous recognoi-
stre & nous ietter entre les bras de sa miséri-
corde : mais mal-heureux, en ce que ne sça-
uons l'heure qu'il iettera son œil d'indigna-
tion sur nous, & nous suffoquera comme
Sodome et Gomorrhe.

Aij

Entre toutes les choses qui se peuvent contempler sous la concauité des Cieux, il ne se voit rien qui plus esueille l'esprit humain, qui plus espouuante, qui engendre plus grande terreur aux créatures, que les prodiges monstrueux, & miracles, esquels nous voyons, non seulement les œuvres de Nature preposterées, renuerfées, mutilées, & tronquées. Qui plus est, nous y descouurons le plus souuent vn secret iugement & fléau de Dieu, par l'obiet des choses qui se présentent, lequel nous fait sentir la force de sa iustice si aspre, qu'il nous contraint d'entrer en nous-mêmes, heurter au marteau de nostre conscience, espelucher nos vices, & prendre en abomination nos mes-faits : principalement quand nous lisons aux histoires sacrées & profanes, qu'aucunes-fois les élémens ont esté hérauts & trompettes, bourreaux & exécuteurs de la iustice Divine. Comme lors que les eaux se desbordèrent, & que les veines du Ciel s'ouurirent, par telle impétuosité, qu'en hauteurs elles surpassoient toutes les montagnes de la terre de quinze coudées. Pareillement aussi, par le feu furent annichillées, & réduites en cendres cinq fameuses Cités,

avec tous leurs citoyens.

Encor est-ce peu de tous ces prodiges, si nous voulons considérer que lors que la fureur de la Maïesté divine s'enflame contre nos péchez, elle ne nous honnore pas tant que de nous daigner chastier par les élémens. Mais afin de plus nous abaisser & tenir en bride, elle veut que les plus vils & abiects animaux de la terre soient les bourreaux de nos vices. Je n'en diray maintenant des exemples, non qu'il m'en défaille, car les histoires en sont pleines : tant seulement i'en toucheray deux en passant ; à sçauoir, comme ce grand monarque Pharaon l'expérimenta, lors que les grenouilles & mouches l'allèrent assaillir iusques à son liest : Semblablement aussi nostre Patriarche Caluin l'expérimenta, lors que les poux le mangèrent, & qu'il fust délaissé de toute sa famille pour la grande puanteur & infection qu'il auoit.

Tout ainsi que nous auons mis en auant les chastiments estranges & espouuentables, toutes fois en pourrions-nous nommer d'autres qui ne sont pas moins esmerueillables, & dignes d'estre contemplés ; de ceux principalement qui ont quelque appréhension des iugemens de Dieu. Mais ie vous détiens

trop sur une chose telle que ceste cy, qui requiert vn meilleur iugement que le mien : encor toutefois que (comme i'ay def-ia dict) l'aage me le permet.

Il est vray, dis-ie, que Dieu ne prodigue pas les miracles à la légère, & sans suiet, & sans nécessité, mais aussi il n'est pas si chiche, que quand la nécessité, & l'importance de son honneur & de ses Saints y ont intérêt, qu'il n'en face voir des effets en tous endroits, & à toutes sortes de gens, pourueu qu'elles se laissent conduire par le flambeau de la vraye foy, qu'elles se rangent au deuoir de son saint service.

Mes concitoyens m'aduouëront que les Apostres & les Saints estans en ce monde, ont fait des miracles : & puis, suiuant la réponse de nos opinions obstinées, ils disent que lors seulement ils ont euz ceste puissance : mais ie leur feray une demande, & les prieray à me répondre dessus, selon que la raison leur fera voir clair au jour.

Or, les Apostres & les Saints estans en ce monde, faisoient-ils les miracles de leur propre vertu ? ils me diront que non, & que c'estoit la puissance Divine qui opéroit par eux, comme instrumens de son pouoir.

Puis, ie me feruiray de ceste réplique : à sçavoir, si Dieu a faict des miracles par ses Saints estans en ce monde, n'en pourra-t-il pas bien faire maintenant ? Sa puissance est-elle altérée en quelque façon ? On voit d'icy l'obstination de nous autres, pauvres desuoyez que nous sommes.

Or, Messieurs, il est à noter que ces iours passés une bourgeoise, ma concitoyenne, ayant ia demeuré enuiron onze iours au travail d'enfant, & les Médecins ne trouuant autre remède plus expédient pour l'en délivrer, que d'appeler les Chirurgiens, aux fins de la fendre, pour tirer l'enfant de son ventre, recognoissant fort bien que c'estoit vn enfant accomply de tous ses membres, les voisines y accourent, qui ore l'une, tantost l'autre, chacune disant son opinion : Entre autre la vint visiter une sienne bonne amie sa voisine, qui menoit, quant & soy sa chambrière, qui estoit Catholique, laquelle fust interrogée par la mère Sage, qui là estoit, luy disant ainsi : *M'amie, qu'auex-vous accoustumé de faire entre vous autres Catholiques, lors que les femmes se trouuent en tel travail ?* Alors elle respond, *Pourueu qu'il me soit donné audience, ie le diray* : lors silence luy fust faict, & elle dist ainsi : *Quand les femmes Catholiques se trouuent*

en tel trauail, elles se recommandent à Dieu le Père tout puissant, au Fils, & au S. Esprit, & à la douce Vierge Marie ; & en outre disent l'oraison de Sainte Marguerite, Vierge & Martyre, la priant vouloir estre aduocate enuers Dieu, afin que la patiente soit tost déliurée de ce trauail : parce que Dieu luy a promis, que toutes celles qui l'inuoqueroient de bon cœur, estant au trauail d'enfant, seroient tost deliurées. La misérable, qui estoit au trauail d'enfant, ayant entendu ces parolles, dict en telle sorte : *Paimerois mieux plustost mourir, ou vrayement enfanter vn veau, que de permettre que l'oraison de sainte Marguerite fust dictée en mon intention :* Responce fort indigne, & dont (comme vous sçauiez très bien) elle en receut tost son guerdon : Car d'un corps formé, d'une âme raisonnable qu'elle auoit dans son ventre, elle sent vn corps brutal, & à l'instant déliure d'iceluy, sçauoir d'un veau, ainsi qu'elle auoit souhaité, lequel fust prins & emporté par la mère Sage à Messieurs. La cloche sonne, ils s'assemblent en la sale du grand Conseil, où fust porté ledict veau : quoy voyant mesdits Sieurs, après auoir entendu le rapport que leur fit la mère Sage des parolles susdites, bien estonnés, ne sçachant que dire sur cela ; vn quidan Philoso-

phe d'entre eux, voulut attribuer cela aux imaginations de la mère, disant cela estre naturellement : Mais il fut très bien repoussé par vn des assistans, lequel disoit que ce ne pouuoit arriver naturellement. Mais aussi, comme i'ay ia dict, quoyque nostre Seigneur soit tout bon & miséricordieux, il ne laisse pas (quand la nécessité & l'importance de son honneur & de ses Saints le requiert) qu'il ne face voir des effets de sa haute puissance.

Toutes les disputes entendues, Messieurs s'assemblent, & ordonnent que ledit veau sera prins & ietté dans le Rosne, là où encor à présent se voient les marques du sang sur l'eau, ne se bougeant, fors seulement, que estant agité des flots, va ores ça, ores là, retournant tousjours en son premier lieu, criant *Vengeance, vengeance*.

Voilà assés pour nous ouurir le cœur, & pour nous faire recognoistre l'obstination de nous autres; & que toutes nos raisons ne sont fondées que sur le sable mouuant de nostre erreur.

Or puisque les Saints qui sont au Ciel sont membres de l'Eglise, & vnis avec toutes les autres parties, sçauoir avec les Catholiques, d'une très-ardente charité, & que

les viuants peuuent s'entreprendre les vns les autres, quelle malice est cela, que nous vouloir défendre ce recours enuers les Saints, plus qu'enuers ceux qui flottent encor avec nous en ceste mer de misère ? Car la raison que nous prenons, de ce que Jésus Christ est nostre seul intercesseur, doit aussi bien valoir pour eux que pour nous. De prier vn homme (qui est encor mortel) qu'il prie Dieu pour nous, n'est-ce pas faire tort à Jésus Christ ? Pour la mesme raison, une chose nous trompe, c'est que nous ne pouuons imaginer que les Saints nous oyent. Les esprits des Bienheureux qui sont esgaus aux Anges, comme dict Jésus-Christ, ignorent-ils ce que nous faisons & disons en ce monde ? & d'où sçauent les Anges qu'un pécheur est conuertý en l'Eglise, pour s'en esjouir au Ciel ? Pourquoy les Saints, qui ordinairement font avec eux, ne le sçauront-ils point ?

Et puisque le mauvais riche a veu du milieu des tourmens des enfers la vie dissoluë que menoient ses frères au monde, & en a eu du soing, que doiuent faire les Saints qui iouissent de la présence de Dieu ?

Or qui doutera que Dieu n'aye plus agréable leurs prières que les nostres, attendu

qu'ils sont sans macule ? car comme dict Notre Seigneur, *Rien de maculé n'entrera dans le Ciel*. Pourquoi donc n'employerions-nous la pureté qui est aux Saints, pour nous servir de plus facile accès envers Dieu ? Si nos ministres veulent que nous les croyions, qu'ils nous donnent plutôt de forts & assurez arguments, que des simples paroles : Car doctrine pour doctrine, celle des Catholiques va devant, & est plus assurée, & sommes venus trop tard, c'est un point arrêté : & n'avons pas besoin de plus grande enquête, que de prendre garde à ce, que ny les Payens, ny tous nous autres brebis sans Pasteurs, n'avons eu le pouvoir de faire aucune œuvre miraculeuse : & partant, il ne faut pas ombrager les traits de la vérité : & devons dire, que c'est l'Eglise Romaine qui est la vraie Eglise, à qui est donnée la puissance de faire des œuvres miraculeuses.

Et afin qu'on ne die que ie parle à l'avantage des Catholiques, & sans preuve de mon dire, qui est celui qui ne sçache qu'un pauvre forçard fut délié des chaînes, lequel on trainoit aux galères l'an 1603 dans Paris, incontinent qu'il eust touché la chaise de sainte Genevieve, qu'on portoit

Bij

en procession générale ? Le ne parle pas d'un temps hors de mémoire, il se trouuera cent de nos confédérés qui le certifieront, mesmement un de ceste Cité, qui me l'a dict, disant l'auoir veu.

Ah ! ouurons maintenant les yeux , pour recognoistre que toutes nos opinions ne sont que semences, conceuës & enfantées d'un cerueau mal timbré, d'un moine défroqué qui a rompu les murailles de son cloistre pour faultier à la voirie du monde, & s'y repaistre au vent de ses sensualités. Voyons donc où cet orage nous iette, & nous despouillons de toute passion, pour donner entrée à la raison en nos consciences. Ouurons l'oreille au S. Esprit, qui y frappe ses coups : apprestons le cœur pour y receuoir la semence de vérité, qui nous donnera vne moisson de tout bonheur, & qui nous remplira de sa grace : c'est assés flotter sur les vagues de l'erreur ; maintenant le port de la miséricorde de Dieu nous appelle, & estend ses bras pour nous receuoir aux chers embrassements de sa bien-vueillance. La parole de vérité nous sert, pour nous faire voir comme nous desmarchons du sentier de ses Commandemens.

Je déplore, & crie tous les iours, avec des larmes que ie répend fur le tombeau de vostre peine & de la mienne : que ne recognoifsons-nous nôtre erreur, & nous iettons au giron de l'Eglise Romaine, qu'elle tient ouvert pour nous recevoir, avec vne ioie incroyable ? Dieu est la vérité mesme, qui ne permettra iamais que l'Eglise bronche en l'herreur d'un misérable naufrage, ny les ames pour lesquelles il a exposé son sang précieux, il est trop jaloux de son honneur, & trop amateur de leur salut, pour les laisser esgarer. Aussi a il dict, qu'il fera avec son Eglise iusques à la fin du monde : ce qui ne peut manquer, & pourtant ne scauroit faillir, puis qu'elle est commandée par vn si bon Pilote, qui la menera au Port de sa gloire, comme il a promis. Recognoissons donc, brebis égarées, qui nous sommes : recognoissons ceste Eglise, & ne nous laissons plus séduire à ces Ministres, adhérans à Calvin & Luther, pipeurs, & veneurs du Diable : car vous ne verrez en nulle part de la Chrestienté prescher aucun miracle dudit Calvin, de Luther, ny de leurs semblables.

Il ne se faut estonner si toutes les Eglises particulieres, qui s'en sont voulu désister

font allées en fumée, comme vne pouffière emportée au gré du vent. Mais ie vous entretien trop longuement : pour la fin, Messieurs, qui estes encor en ce grand Océan, & tous noyez dans ce gouffre, dont Dieu m'a retiré; ie vous prieray de vouloir désormais vous embarquer dans la nauire de l'Eglise, & vous y tenir ferme, ou plustost vous y laisser attacher au mas d'icelle, à l'exemple de cet ancien Orphée, de peur que ces charmeuses Sereines ne vous en tirent; & qu'estans embarquez ensemble, nous voguions tous en ceste grande mer, sous la Maïesté du Père, & sous la conduite du Fils, nostre Rédempteur; avec vn vent propice du Saint Esprit, à la conquête du Royaume de cet Agneau, qui pour nous fust immolé, c'est à dire à la vie éternelle. Ainsi soit-il.

FIN.



MON·DOVLX·SEIGNR·

ET·VERTVS·DENOS·PERES·

·QV·MERVE·IL·ES·OP·ERES·

·RE·NE·MI·PP·OE·

·CR·ES·NO·VS·I·ES·DIT·Z·

*À Arras, de l'imprimerie de Rousseau-Leroy,
rue Saint-Maurice, au numéro 26.*